

Jí² gasii¹ in San Pablo tii²i tsá² 'in néei¹ Filipos

Poo² taain²¹² 'nuñi³ joon sii¹ in jí² tya' 'in jai² líi²
Cristo néei¹ fuu²¹ Filipos

1 ¹ Poo² coon¹³ Timoteo sii¹ in 'e jí² lo. Jna'oo'o líi² na'a tsá² jmoo¹ o to² tyu² Jesucristo. Sii² na'a 'e jí² lo tii² jilee²¹ naa' 'in jai² líi² Cristo 'in néei¹ fuu²¹ Filipos. Sii² moo'o 'e jí² lo jon tya' 'in tyu² to² 'naa' coon¹³ tsá² 'in uncoon¹³ 'in tyu² to² do. Tsá² tya' Dios 'naa' joon nisicaan²¹ naa' coon¹³ Cristo Jesús. ² Cwouncwaai¹³ Dios 'naa' joon cwocwoo¹ Nu¹u' Dios Jmii²¹ coon¹³ Ña'ñu¹u' Jesucristo 'e seen²¹ naa' tyú²-u.

Poo² faa²¹ a júu³ tyú² tya' 'in jai² líi² Ña'ñu¹u'

³ La coon²¹ naa¹³ mo tii¹³-tsii' naa' cwo³oo 'maai¹³ Dios tyiia. ⁴ Mo fo³oo júu³ tyú² mí³ii tyani Dios Jmii²¹ 'wii²¹² tyii' 'e jløø¹³ moo. ⁵ Cwo³oo 'maai¹³ Dios 'e ca jmi²¹² li ga'naai²¹² 'wii²¹² la joon jon ca li no nigajmoo²oo' to² caan²mo coon¹³ jna'a 'e cwo²¹o' júu³ tyú² tya' Dios. ⁶ Cwo³oo 'maai¹³ Dios joon ní³oo, jo cu¹²-tsii coon¹³ Dios 'in ga'láa² 'wii²¹² jmoo¹o coon²¹ to² tyú² jee²¹² 'naa', 'ii ijmaa¹gi la ngó¹ 'naai¹³ ca tí² jmi²¹² mi cwéei¹ Ña'ñu¹u' Jesucristo. ⁷ 'Áa¹mo tyú² 'e 'i¹-tsii la no 'wii¹³ 'naa' tsu 'áa¹mo 'iin²¹² na 'naa' tsu 'wii¹³ niga'ii¹³mo' ca ní³mo fo'fee¹ tya' Dios. Joon xufiin¹³ 'úu³ na 'nuñi³ joongi xufiin¹³ isiin¹³ na tyani tsaa'to² líli¹ un'øø¹ moo 'e júu³ tyú² tya' xiiala itiin¹³ tsá². Siin¹³ moo 'ñii'a 'e júu³ jai² 'e júu³ lo. ⁸ Ñi¹ Dios xiiala 'iin²¹² na jileei²¹ 'naa' la 'iin²¹² in Jesucristo 'naa'. ⁹⁻¹⁰ Mi fo³oo júu³ tyú² mí³ii tyani Dios 'wii²¹² tyii' 'e ili'in²¹² gii' Dios coon¹³ tsá². Mí³ii jon icwó² Dios 'e 'øøi²¹gi-'oo' joon 'e lijmi¹gi-'oo' 'e liñi²ii' jmaai¹³ 'e tyú²gi. Tsu la joon jo 'leei²¹gii' tyani tsá². Joon jiin¹³ coon²¹ jo 'ee tsaa² ñi²gii' mi cwéei¹ Cristo Jesús. ¹¹ Joongi mí³gii 'e coon¹³ 'ii²¹ tya' Jesucristo ijmaa²aa' jilaa²¹ 'e tyú² joon coon¹³ 'e tyú² jmoo²oo' iun'goo¹ tsá² Dios Jmii²¹ joon ifaa²¹ a júu³ tyú² tya' Dios Jmii²¹.

Juncwii²¹ tyiia 'e tya' Jesucristo jon

¹² Tsaru¹u', 'iin²¹² na 'e liñi²ii' 'e jilaa²¹ 'e ningii³ na gauncoon¹³ on tyiia joongi gauncoon¹³ on tya' 'in catyaai² 'e cwo²¹o' 'e júu³ tyú² tya' xiiala itiin¹³ tsá². ¹³ La joon ce jileei²¹ 'láa² 'in néei¹ inuu tya' røøi¹³ joon jileei²¹ 'in catyaai² ñi¹o 'e siin¹³ na 'nuñi³ 'wiin¹³ 'iin²¹² na júu³ tya' Cristo. ¹⁴ Joon mo galiñi³ tsaru¹u' 'e 'yúu³ na 'nuñi³ xiia²¹ jo jilee²¹ mo gatyaa¹-tsi cwo² júu³ tyú² tya' Dios jo 'ee 'goo²¹o, jo 'ee-gi cu¹²-tsi coon¹³ Ña'ñu¹u'.

¹⁵ 'E ja²mo, seen²¹mo 'in líí¹³ 'in cwó¹ júu³ tya' Cristo tsiwúu¹i, 'noo¹o 'mii¹³ pe 'in líí¹³gi cwoo¹o júu³ tyú² 'e jløø¹³mo. ¹⁶⁻¹⁷ 'In tsá² do cwoo¹o júu³ tyú² tsu 'wii¹³ 'iin²¹²mo jna. Ñi¹o 'ido 'e Dios gasii¹in jna lo 'e un'øø¹moo 'e júu³ lo. 'In catyaa²gi do cwoo¹o júu³ tyú² tya' Cristo la 'øøi²¹-tsi yaai 'yu to² jmoo¹o móo³gii wúu¹ tsi 'nuñi³. Jon' jai² to² ngii¹i. ¹⁸ Jo ñi³ii 'ee 'e lí² do, jna-a, jløø¹³moo ngóo¹ 'naai¹³ cwoo¹o júu³ tyú² tya' Cristo. Jløø¹³moo mo cwoo¹ tsá² júu³ tya' Cristo 'wii¹³ 'iin²¹²mo Ña'ñu¹u'. Jløø¹³moo jon mo cwoo¹ tsá² júu³ tya' Cristo xufiin¹³ jon' jo² 'iin²¹²in Cristo tsu coon¹³ la joon inúu²u tsá² júu³ tya' Cristo.

Joon ilijløø¹³moo ¹⁹ tsu ñi³oo 'e coon¹³ júu³ tyú² tyii' joongi coon¹³ 'e uncoon¹³ icwó² 'in Espíritu Tyú² tya' Dios jna ilaa²¹moo. ²⁰⁻²¹ Jiin¹³ 'e 'iin²¹²na ijaan¹gii jo cwoli¹i lí²na, joon lí²-i fo¹³oo jo 'e cu²gi-tsii jiin¹³ la nifo¹³oo la joon ifo¹³oo tún¹. Iin²¹²na un'góo³oo Jesucristo coon¹³ jilaa²¹ 'e jmóo³oo. Jo 'e lí² xufiin¹³ wa'a jin¹³iin si najúun³na 'ee. Tsu wana táan³na jiin²¹iin la jiin²¹ Cristo si ni'lí³na 'ee 'e nisáa¹mo joon tyiia. ²² Pe wana táa²mogii juncwii²¹ jmáa³gii to² la ngóo¹ 'naai¹³ 'e cwóo³oo júu³ tyú² tya' Dios. Jo ñi³ii 'ee ijmáa³aa, ²³ 'áai¹ tyáan² to² tyiia la ji tún² 'ii¹³. Coon²¹ lí²na 'e jmee²¹gi tyiia 'e júun³na joon nii¹³na nini²¹²ii coon¹³ Ña'ñu¹u'. ²⁴ Pe coon²¹ 'elo jmee²¹gi tyii' 'e taan²¹²mogii juncwii²¹ lo. ²⁵ Niliñi³mo-tsii itaan²¹²mogii juncwii²¹ coon¹³ 'naa' 'e uncoon¹³oon 'naa' 'e liñi²gii' 'e taan²¹²'naa' 'e jløø¹³moo' coon¹³ júu³ tyú² tya' Cristo. ²⁶ Tsu icwaa¹³moo jee²¹² 'naa' 'e coon¹³ la joon ingi²ii' jløø¹³moo' coon¹³ Cristo joon unfee¹gii' Cristo.

²⁷ Cwoo¹³-oo' 'e ngi²ii' jiin¹³ la tii² ngi² tsá² 'in jai² líí² Cristo tsu la joon xufiin¹³ yajøø³na 'naa' si wíin² taan²¹²na 'e inúu³oo xiiala ngóo¹ 'naai¹³ seen²¹'naa' tá² taain²¹²-oo'. Caan²mo ngi²ii' cwoo¹oo' júu³ tya' 'e tiin¹³ tsá². ²⁸ Joon jo foo¹³'naa' wana 'in 'iin²¹²in toon²¹ fo¹²-oo' 'in 'eei¹ 'naa'. Tsu coon¹³ la joon ilini¹ 'in 'eei¹ 'naa' 'e tsalín² li 'ii²¹ pe 'naa'gii' cwoliin²'naa' fu ñufú². Joon Dios gajmaa¹a jilaa²¹ 'elo. ²⁹ Joon jon' wa'a jiin¹³ 'e jo² líí²'naa' Jesucristo pe Dios cwo¹o 'naa' 'e wúu¹ móo²oo' 'wii²¹² tya' Jesucristo. ³⁰ Móo¹³-oo' ngii²¹i' jmoo²¹o' caan²mo. Ñi²oo' jilaa²¹ wúu¹ nimoo²¹²oo. Joon la no núu²oo' 'e wúu¹ móo³oo. Joon 'naa' itsangí²'naa' la joon.

Xiiala líí¹i Jesucristo mo jó¹ juncwii²¹ joongi jilaa²¹ 'e 'ya²gi tya'a

2 ¹ In cáan²na' tsu 'wii¹³ ja²mo líí²na' Jesucristo joon tsu 'wii¹³ 'iin²¹²mo' la jaain²¹ la jaan²¹na' cwóo¹³o' pí² yiia', joongi cwóo¹³o' fo'fee¹ ru¹u'. Nigajmoo²¹o' to² caain²¹ coon¹³ 'ii²¹ tya' Espíritu Tyú² tya' Dios. Ningalii²¹i' 'e fúu² líí²na'. ² 'Wii¹³ joon 'naa' jmóo²oo' 'e jløø¹³moo 'e naseen²¹moo' 'e tyú². In caan²moo' tsu 'wii¹³ 'iin²¹²moo' ruu²¹'naa' la jaain²¹ la jaan²¹'naa'. Jløø¹³moo wana 'e seen²¹'naa' 'e coon²¹ 'e 'i¹-oo'. ³ Jo jmaa²aa' wa 'iin²¹²'naa' 'e sái² tyii' jon'gi 'e jmaa²aa' jløø¹³. Jmé¹³'naa' yaanaa' tsá² coon²¹ tún². Tyíin²gi 'e 'i-oo' cwáain¹ tya' 'in catyaa² do

lagi yaanaa'. ⁴ Jo jmaa²aa' wa'a jiin¹³ 'e tyú² tyii' yaanaa', 'ná²-a jmaa²aa' 'e tyú² tyii' ce jilee²¹mo.

⁵ Tyiin²mo 'e 'i¹-oo' la li 'e ga'i¹-tsi Cristo Jesús. ⁶ Tsu xufiin¹³ Dios 'ii jo fúu² gali²i 'ña'a. Jo gajmaa¹a jiin¹³ 'e tñi² jmáa¹a tsu 'wii¹³ Dios 'ii. ⁷ Joon gatyaa¹a caa¹mo jilaa²¹ 'ii²¹ 'ya² tya'a, joon ga'íi¹ lawa jaain²¹ tsá² ti' tsá². Joon gaunjii²¹ tsá² seen²¹ ni cwoo¹³ juncwii²¹. ⁸ Joon líi¹i jaain²¹ tsañu¹ joon ga'ii²¹mo jo 'ee fa'ii²¹ líi²i 'e ijúuin² tsaa¹ crúu¹³. ⁹ 'Wii¹³ joon gacwo²o Dios Jmii²¹ 'ii to² fee¹gi la jee²¹² jileei²¹. Joon gacwo²o 'ii 'e sii²¹ Cristo Jesús. Joon 'e sii²¹ do 'e joon 'e tyiin²gi la jee²¹² jilaa²¹. ¹⁰ Tsu jiin¹³ coon²¹ moojni² tsá² jo sá² wa'a jo juui¹³ tyaní¹i mo núu²uu 'e sii²¹ 'in no Cristo Jesús, xufiin¹³ 'in taain²¹² ñu'fú² si 'in taain²¹² juncwii²¹ lo 'ee, si 'in najóin¹ 'ee. ¹¹ Joon coon¹³ la joon ijmá¹ jileei²¹ tsá² júu³ 'e Jesucristo líi¹i Ña'ñu¹u'. Coon¹³ 'e la joon iuntyú¹mo Dios Jmii²¹.

'In jai² líi² Jesucristo 'ná² uncoon¹³ 'in catyaa² ilicwii¹mo jon Jesús

¹² Tsu 'wii¹³ joon, tsaru¹u', 'in 'iin²¹²na, galinu¹³oo' júu³ tya' Dios mo gataan²¹²na jee²¹² 'naa'. Jmaa²gii¹ núu¹³uun' la ngóo¹ 'naai¹³ xufiin¹³ jo ngí³ii jee²¹² 'naa'. Cwoo¹³-oo' untiin¹³naa' jilaa²¹ júu³ 'e 'iin²¹² Dios lí² jee²¹² 'naa'. Jmaa²aa' coon²¹ ce tún². Jmaa²aa' cu²-oo' yaanaa'. ¹³ Tsu cwo²o Dios 'naa' 'e 'iin²¹²naa' jmaa²aa' joongi uncoon¹³o 'naa' ilí²ii' jmaa²aa' jiin¹³ la lí² 'e 'iin²¹² Dios.

¹⁴ Jmaa²aa' jilaa²¹ 'e 'ná² jmaa²aa' 'e tya³-oo' jon'gi wa'a 'e jo cwoo¹oo' júu³ ruu²¹naa'. ¹⁵ Coon¹³ la joon jo lí² cwo² tsá² 'naa' tsaa, jogi lí² wa'a jin² tsá² 'e jo untiin¹³naa' 'e jo²o líi²naa'. Lí¹ la cii¹³i 'e lí² nogi ilíin²naa' jóon¹ Dios Jmii²¹. Jo 'in 'leei²¹naa' xufiin¹³ taan²¹naa' jee²¹² tsá² 'líi¹³, tsá² 'in jo tsáa¹ ngí¹. Ijná² joo²¹ 'naa' jee²¹² 'ii lawa jaain²¹ núu¹ 'ii²¹ juncwii²¹ mo nuu²¹. ¹⁶ Ngí²ii' la ngóo¹ 'naai¹³ cwoo¹oo' tsá² júu³ tyú² tya' Dios tsu joon cwoo¹o Dios juncwii²¹ tya' tsá² coon¹³ 'e júu³ no. Tsu la joon mi jó² Jesucristo joon jløø¹³moo coon¹³ 'naa'. Jløø¹³moo tsu ñíi³oo 'e jo ti² gagoo²¹²oo jee²¹² 'naa' jon'gi jo ti² to² gajmáa³aa jee²¹² 'naa'. ¹⁷ Joon xufiin¹³ 'ná² júun³na 'e uncoon¹³oo 'naa' ijmáa³gii jiin¹³ la to² tyu² Dios. Joon ilijløø¹³moo coon¹³ 'naa'. ¹⁸ Joon la joon 'iin²¹²na 'e jløø¹³moo' coon¹³ jna.

Xiiala líi¹ Timoteo coon¹³ Epafrodito

¹⁹ 'I¹-tsii wa'a icwó² Ña'ñu¹u' Jesucristo isí²na Timoteo 'e jajóø²i 'naa'. Tsu joon ilijløø¹³moo mi liñí³ii xiiala seen²¹naa'. ²⁰ Jiin¹³ 'ii-o 'i¹-tsi la li 'e 'i¹-tsii cwáain¹ tyii'. Joon 'e la ja²mo cu²-tsii'i xiiala seen²¹naa' coon¹³ 'e tyú² tyii'. ²¹ Jileei²¹ catyaa² 'noo²¹on jiin¹³ 'e tyú² tya'a yaamo, líi²i 'e jo 'ee cwáain¹ tya'o 'e júu³ tya' Jesucristo. ²² Pe ñíi³oo xiiala líi¹i Timoteo, tsá² tyú²-tsi 'ii. 'Áa¹mo nigauncoon¹³ jna cwóo¹³o'o júu³ tyú². Lawa'a yuun²¹ tyiia-oo 'ii. ²³ Joon 'i¹-tsii isí³na Timoteo jajóø²i 'naa' mi liñí³ii

xiiala ngóo¹ seenna. ²⁴ Líi²na 'e Ña'ñu¹u' icwó² wa'a yajóo²na 'naa' la jmoonoo.

²⁵ Pe la joon jon líi²na 'ná² síi²na jon 'in tsaru¹u' Epafrodito 'in gasiin¹ 'naa' iuncoon¹³ jna jilaa²¹ jmaai¹ to² tyiia. Nigajmoo²¹o'o to² caain²¹ coon¹³on coon¹³ jilaa²¹ fa'í³ 'e seen²na'a. ²⁶ 'Áa¹mo gali'in²¹²in jajóo¹i 'naa' tsu cu²-tsi tyii' tsu ñi¹o 'e ñi²ii' júu³ 'e tsaa¹³o. ²⁷ 'E ja²mo galitsaa¹³a Epafrodito do, la mo júun¹mo pe Dios galifeei¹-tsi 'wii²¹² tyia'a. Joon jon'gi wa'a jiin¹³ tyia' 'ii pe cagi 'wii²¹² tyiia 'e jo galifee¹gi fa'í³-tsii 'e seen²na. ²⁸ Tsu 'wii¹³ joon isíi³na Epafrodito tsu joon lí² jlóo¹³moo' mi máa¹naa' 'ii tún¹. Coon¹³ la joon jo cu²gi-tsii tyii' mi líi³ii 'e taain²¹jee²¹² 'naa'. ²⁹ Mi tyíi¹a no 'ii¹³naa' 'ii 'e jlóo¹³naa' lawa jaain²¹ruu²¹moo' 'in jai² líi² Ña'ñu¹u' Jesucristo. Joon cwoli'in²¹²naa' jileei²¹catyaai² 'in líi¹ la líi¹ 'ino. ³⁰ Coon²¹ xu^u jo gajúun¹in 'wii¹³ jmoo¹o la to² tyu² Jesucristo. Ga'ii²¹ fu¹ ngóo¹ li 'ii²¹ fo² 'áai¹ tyia'a 'e jmáa¹a to² tyani³ii 'e jo lí² jmáa² 'naa' yaanaa'.

'In la jai² jóon¹ Dios 'in un'goo²¹o Dios Jmii²¹

3 ¹ Tsaru¹u', cwoli²du' doñi'ee lí² jlóo¹³naa' jmaa²aa' tsu tsá² tyia' Ña'ñu¹o' 'naa'. Tya jna-a jo 'ee untyíi² wa'a fo³oo tún¹ la lí² 'e nifo³oo ni jí² 'e nisíi²na tsu 'áa¹mo tyiin² tyii'. ² Un'óoi¹ 'naa' yaanaa' coon¹³ 'in tsá² jmoo¹o 'e gó², 'in jmoo¹o li² sii²¹ circuncisión tyia' tsá². Jna-a unsii²¹ 'in tsá² do "tsii²¹". ³ 'In tsá² do jin²in 'e coon¹³ 'e li² jmoo¹o no 'e líi¹na' jóon¹ Dios. Pe jo jo² la jin²in. 'Elo-o 'e júu³ jo²: 'In tsá² 'in un'goo²¹ Dios coon¹³ 'ii²¹ tyia' Espíritu Tyú² tyia' Dios líi¹ jóon¹ Dios. Jna'o' 'in la jai² jóon¹ Dios Jmii²¹. Saan²¹an' 'e jlóo¹³mo' tsu Cristo Jesús galáa²mo jna' joon cu²u-tsi' coon¹³ 'e li² ngii¹i jma²i tsá². ⁴ Wa lí² 'i¹-tsi tsá² 'e jóon¹ Dios Jmii²¹ 'wii¹³ cwáain¹ tyia' 'e li² jmoo¹o tsá² 'e joon ce jiin¹³ jaain²¹ jo 'in li²gi la li³ii jna tsu tsai' tsá² Israel jna. ⁵ Mo gatí² jñá² jmii²¹² 'e ngaa¹³ii joon galíi¹na 'e li² circuncisión do. Coonti líi¹na jún² tsá² Israel tsu 'lii²¹² tsaun'áai¹ tyiia sii²¹ Benjamín joon jileei¹³ tsacóoi¹³ tyiia 'in ngaa¹³i Israel 'i. Ga'óoi²¹-tsii ley tyia' Moisés la 'óoi²¹-tsi tsá² tyia' fariseos. ⁶ Gajmáa³aa ce caain²¹-tsii 'e ley do. Joon gasaan²¹moo 'in jai² líi² Cristo taa²¹na 'ii 'nuñí³. Gajmáa³aa la to² tyu² ley tyia' Moisés ce jiin¹³ jaain²¹ jo lí² jmá¹ tsaa² tyiia. ⁷ Jilaa²¹ 'elo ca la jéei¹ 'áa¹mo tyíin² tyiia pe la no jo 'ee tyíin²gi coonti tyiia 'wii¹³ tyia' Jesucristo. ⁸ Pe jilaa²¹ 'e la mo i'óo³oo do gatú³uu li' caa²¹mo tsu 'i¹-tsii jo 'ee tyíin² jiin¹³xu mo gaunciíi¹ la tyíin² mo galicwii¹in tsá² Jesucristo lawa'a Ña'ñu¹u'. Joon 'wii¹³ Jesucristo ga'ín²moo jilaa²¹ 'elo joon jmoo³-oo cwáain¹ lawa tyi¹-i tsu 'iin²¹²na 'ii¹³na jilaa²¹a 'e cwo² Cristo jna. ⁹ Joon 'iin²¹²na 'e tye¹ Dios jna 'e licaa²¹na coon¹³ Cristo jon' wa' 'wii¹³ jmóo³oo 'e tyú² jiin¹³ la to² tyu² ley do pe tsu 'wii¹³ Dios gauntyú¹mo jna 'wii¹³ ja²mo líi²na Jesucristo. Tsu tyú¹mo tsá² tyani Dios jiin¹³ wii¹³ ja²mo líi² Cristo. ¹⁰ Cristo gajiiin¹injee²¹² 'lii²¹² 'ii²¹ tyia' Espíritu Tyú² tyia' Dios

Jmii²¹. Joon 'iin²¹² na 'e cwo²o Dios Jmii²¹ jna jon 'e taan²¹² na juncwii²¹ coon¹³ 'ii²¹ do 'e gajmaa¹ a jiin¹ in Cristo. 'Iin²¹² na móo³oo wúu¹ la ganii²¹ 'ido wúu¹. 'Iin²¹² na 'e taan²¹² na juncwii²¹ 'e 'i-tsi la li 'e ga'i¹-tsi Jesucristo la mo gajúuin¹ cwáain¹ tya' tsá² taain²¹² ni cwoo¹³ juncwii²¹.
¹¹ 'Iin²¹² na jmáa³aa jilaa²¹ 'elo wa'a li¹ii jon jin¹iin jee²¹² 'lîi²¹² la gajjin²¹ 'ii-o.

'Áa¹mo cwo²-tsi Poo² untiin¹³ in jiin¹³ la to² tyu² Dios

¹² Jo 'iin²¹² na fuu²¹²uu 'naa' 'e nigauntiin¹³ mo Dios jmeei¹ jna jiin¹³ la 'iin²¹² in, jon'gi 'iin²¹² na fuu²¹²uu 'naa' 'e seen² na jiin¹³ la 'e fo³oo nota. Pe jmáa³gii la ngóo¹ 'naai¹³ 'e ilíin² na la joon. Tsa 'wii¹³ joon Jesucristo gatø²ø jna ilíin² na tsá² tya'a nifu. ¹³ Tsaru¹u', jo fuu²¹²uu 'naa' wa'a nigauntiin¹³ na jilaa²¹, pe la no ngóo¹ 'no² jmóo³oo 'e 'iin²mo-tsii jilaa²¹ 'e nijmáa³aa la jéei¹ joon cwo³oo pí³ 'ñii¹ 'e untiin¹³ na jilaa²¹ 'e 'ná² jmáa³aa nifu. ¹⁴ Iin²¹² na untiin¹³ na joon coon¹³ la joon iuntiin¹³ mo Dios Jmii²¹ jiin¹³ la 'iin²¹² in cwáain¹ tyiia 'wii¹³ Jesucristo. Joon 'iin²¹² in Cristo cwo²o jna 'e nii¹³ na ninii²¹²ii coon¹³ on ñu¹fú².

¹⁵ Joon tya' jileei²¹ tsá² 'in la jai² líii² júu³ tya' Dios joon jmoo¹-o tyiin² 'áa¹mo 'e 'i¹-tsi la no. Joon wana 'i¹-oo' 'e xiia²¹ joon Dios ijmáa¹ 'øøi²¹-oo' 'elo. ¹⁶ Pe 'elo 'áa¹mo tyiin² jmoo²¹o'. 'Ná²-a 'i¹-tsi', la joon jon 'ná²-a ngii²¹i' tyani tsá² jiin¹³ la nigaøøi²¹-tsi' júu³ tya' Dios.

¹⁷ Tsaru¹u', jmáa²aa' la jmóo³oo, joon tyáan²aan' cwáain¹ 'in jmoo¹o la jmoo²¹o'o. ¹⁸ Nifuu²¹²oo 'naa' 'láai² naa¹³ joongi ifo³oo tún² ca 'e la xuui²¹²-tsii 'e fúu¹mo 'in jin² 'e jo²o líii² júu³ tya' Jesucristo pe jilaa²¹ 'e jmoo¹o la mo 'ee²¹mo júu³ tyú² do 'e jin² in 'e nijuun¹mo Jesucristo tsa² crúu¹³ 'wii²¹² tyi'. ¹⁹ Joon li tséi¹ i'íin²mo 'in líii¹ la joon. Un'goo¹-o 'ido wa'a lisá² jiin¹³ 'e la 'iin²¹²mo 'e 'íi¹³ lawa'a 'e un'goo²¹o Dios. Tsa joon 'e jløø¹³mo 'e 'íi¹³ lawa 'e fa'ii²¹ líi²i. Canii² 'e 'i-tsi jiin¹³ 'e sá² ni cwoo¹³ juncwii²¹. ²⁰ Pe 'in 'íi³mo jna 'ñu¹fú² joon sijáan³o' 'e ñu¹fú² ijó² 'in jmá¹ tiin¹³ jna' 'in sii²¹o Ña'ñu¹u' Jesucristo. ²¹ Coon¹³ jilaa²¹ 'ii²¹ 'e 'oo¹o iunsí²mo cuerpos tyi' ijmáa¹ lawa cuerpo tya'o 'e 'ya²gi 'áa¹mo. Coon¹³ 'ii²¹ joon tyu²o to² jilaa²¹ 'e sá² jmaa¹ a jiin¹³ la 'iin²¹² in.

Jløø¹³naa' jmáa²aa' tyani Ña'ñu¹u'

4 ¹ 'Wii¹³ joon, tsaru¹u' 'in 'iin²¹² na, tá² siin²naa' yaanaa' tyani Ña'ñu¹u'. 'Áa¹mo 'iin²¹² na 'naa' joon 'áa¹mo 'iin²¹² na jøø²na 'naa'. 'Naa'oo' jmóo²oo' jløø¹³na. Joon 'naa' ilíin²naa' lawa corona tyiia mi cwéei¹ Ña'ñu¹u'.

² Mí³ii tyani Evodia, la joon jon tyani Síntique wa'a cwosí¹³mo róø² lawa ruu²¹mo 'in jai² líii² Ña'ñu¹u'. ³ Joon 'ñu, tsaru¹u' 'in nijmáa³aa to² caain²¹ coon¹³ lawa cajmuui¹ joo²¹ 'íin¹ 'in 'ñúui¹³, mí³ii tyaní²i uncoon¹³ on 'in tsamí² ru¹u' do. 'Ii gauncoon¹³o jna cwoo²¹o'o júu³ tyú² tya' Dios tya' 'e tiin¹³ tsá². Coon²¹ caan²¹mo gacwoo²¹o'o 'e júu³ tyú² do

coon¹³ Clemente coon¹³ 'in catyaa² do. Joon Dios gataan¹an ni jí² tyá'a xiiala sii²¹ jileei²¹ 'ii.

⁴ Jmaa²aa' jløø¹³naa' tyani Ñañu¹u' coon²¹ tøø²mo. Fo³oo tún², jløø¹³naa' jmáa²aa'. ⁵ Cwolicwii¹mo tsá² 'naa' 'e 'wo²-oo'. Ti li cwée¹mo Ñañu¹u'.

⁶ Jo jmaa²aa' cu²-oo' ce jiin¹³xu, li' cii¹³i jmaa²aa', mí²ii' tyani Dios Jmii²¹ tyá' jilaa²¹. Fáa¹³aa' júu³ tyú², cwóo²oo' 'maai¹³ Dios jon. ⁷ Tsu joon icwo²o Dios 'naa' 'e seen²naa' tyú² la li 'e seein²¹ 'ña'a. Joon ce jiin¹³ jaain²¹ tsá² wa ilí² 'øøi²¹-tsi jilaa²¹ 'e tyú² seein²¹ Dios, tsu 'e tyú² do 'e fee¹gi 'e jo 'in cwéei¹ 'øøi²¹-tsi. Tsu 'e tyú² do iun'øøi¹ almas tyii' coon¹³ jilaa²¹ 'e 'i¹-oo' tsu 'wii¹³ jai² líi²naa' Cristo Jesús.

'Í²-oo' jmai² 'e tyú²

⁸ Coon²¹gi 'iin²¹²na fuu²¹²uu 'naa', tsaru¹u', 'Í²-oo' jilaa²¹ 'e jai², joongi jilaa²¹ 'e tyú², coon¹³ jilaa²¹ 'e røø². Jo 'i¹-oo' coon¹³ jilaa²¹ 'e un'leei² tsá² yaai. 'Í²-oo' jilaa²¹ 'e 'ya²gi coon¹³ jilaa²¹ ifaa²¹ tsá² 'e tyú². 'Í²-oo' jiin¹³ 'e tyú²gi coon¹³ jilaa²¹ 'e cwóo²oo' 'maai¹³ Dios.

⁹ Untii²naa' yaanaa' jilaa' ga'e³ee 'naa' joon jmaa²aa'. Jmaa²aa' jilaa²¹ jiin¹³ la ganúu²uu 'e nifo³oo coon¹³ jilaa²¹ 'e gañí²ii' jmóo³oo. La joon 'in Dios 'in cwo² 'naa' 'e tyú² seen²naa' ingí¹ caain²¹ coon¹³ 'naa'.

'E gacwo¹ 'in seein²¹ fuu²¹ Filipos gauncoon¹³on Poo²

¹⁰ Jløø¹³na 'áa¹mo tyani Ñañu¹u' mo galiñii² 'e gati²-oo' jna tún¹. Jo 'iin²¹²na fo³oo 'e ga'ín¹-oo' jna pe jo mo gauntyí² fu wa'a 'e uncoon¹³ 'naa' jna. ¹¹ Jo fuu²¹²uu 'naa' wa' mo 'in tyéen¹³na jmii²¹². Tsu nilitii²¹moo xiiala itaan²¹na juncwii²¹ jløø¹³moo coon¹³ 'e xu 'e 'óo³oo. ¹² Niñí³oo xiiala li mo tañí² tsá² la joon jon ñí³oo wa'a mo 'óo³oo sái²xu. Nilitii²¹na xiiala taan²¹na 'e 'yaa²¹-tsii 'e røøi² tu³uu si 'e un'áa³na 'ee. Jløø¹³moo coon²¹ tøø²mo wa'a mo 'óo³xu la joon jon wa'a mo jo 'ee sá² tyiia. ¹³ Lí²-i jmáa³aa doñi'ee tsu Jesucristo cwo²o jna wa² pí² tyiia. ¹⁴ Pe 'naa' 'e tyú² gajmáa²aa' tyiia mo gauncoon¹³oon' jna coon¹³ fa'í² 'e seen²na.

¹⁵ Joon ñí²oo' 'e jiin¹³ 'naa' tsá² seein²¹ fuu²¹ Filipos gauncoon¹³oon' jna mo gajú³uu Macedonia nifu, nicwó³oo júu³ tyú² tyá' 'e tiin¹³ tsá². Jiin¹³ 'naa'oo' jee²¹² jileei²¹ 'in nijai² líi² Jesucristo gacwóo²oo' jna 'e jmaai¹ to² tyiia tsu 'wii¹³ nicwó³oo júu³ tyú² jee²¹² 'naa' 'e ni'ii¹³naa'.

¹⁶ Tsu la 'ii²¹² 'e taan²¹na fuu²¹ Tesalónica gauncoon¹³oon' jna cafu líi¹gi tyá' jilaa²¹ 'e tyée¹³na. ¹⁷ Jon' wa'a 'i¹-tsii jiin¹³ 'e 'ii¹³na, pe jiin¹³ 'e 'iin²¹²na 'e li'óo²oo' líi¹gi cwáain¹ tyii' tyani Dios Jmii²¹. ¹⁸ Ni'ii¹³moo jilaa²¹ ca gasai²gi. Coon¹³ 'e gasii¹naa' coon¹³ Epafrodito 'óo³oo 'láai²gi. 'E gasii¹naa' do tyiia lí¹ lawa coon²¹ fa¹ tyani Dios, lawa sún² jmafuu²¹ 'áai¹. Joon 'yaa²¹-tsi Dios 'wii¹³ 'e gauncoon¹³oon' jna. ¹⁹ La joon jon Dios tyiia-oo icwo²o 'naa' jilaa²¹ 'e 'náa²aa'. Icwo²-o 'naa' 'e

'náa²aa' 'wii'¹³ Jesucristo tsu 'áa¹mo sá² tya'a fu ñu'fú² li 'ya'²gi 'áai¹.

²⁰ iCwoun'goo²¹ o jileei'²¹ tsá² seein²¹ juncwii²¹ Dios Jmii²¹ coon²¹
tøø²mo! Amén.

Júu³ li gatséi¹

²¹ 'Aa²¹²mo tsá² fu'²¹u 'e fo'³na coon'¹³ la sii²¹ Jesucristo jileei'²¹ 'in jai'²
líi² Dios Jmii²¹. Jileei'²¹ tsaru'¹u 'in taain²¹² coon'¹³ jna lo sii¹mo jon
'aa²¹²moo'. ²² La joon jon sii¹mo 'aa²¹²moo' jileei'²¹ 'in 'iin²¹²in Dios Jmii²¹
'in jmoo¹o to² inuu tya' tsaa'to² nifu tyiin¹ Roma.

²³ Cwouncwaai'³ Ña'ñu'¹u' Jesucristo jileei'²¹ 'naa'. Amén.